


# Veqaura Baibel



Portions of the New Testament in the Veqaura (Meauna)  
dialect of the Omwunra-Toqura (South Tairora) language of  
Papua New Guinea

**Veqaura Baibel**  
**Portions of the New Testament in the Veqaura (Meauna) dialect of the**  
**Omwunra-Toqura (South Tairora) language of Papua New Guinea**  
**Sampela hap Nupela Testamen long tokples Veqaura long Niugini**

copyright © 2012 Wycliffe Bible Translators, Inc.

Language: Veqaura (Omwunra-Toqura or South Tairora)

Dialect: Veqaura (Meauna)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-03-19

---

PDF generated using Haiola and XeLaTeX on 8 Sep 2021 from source files dated 18 Aug 2021

7f17bf7b-ed7f-57a2-89c1-2b7308ad99ef

Contents

Matiu . . . . .	1
MAAKI . . . . .	5
RUKI . . . . .	10
IONI . . . . .	14

## Matiu 13

*Sia suqe si sukura uiti tutoraqi pisorara tura*

<sup>24</sup> Sisasiva mwaro mwo kuaqaa nuase nraase qora timwa nyiro tiro, Kotiva nraase qoraqaa naqisiariva vasirero mwaa kuara votaama vaiso. Vainti mwovano suqe si sukura uiti suku nrai vutaqi mwara tuse <sup>25</sup> uro enaqi nrai nramwunaavaqa vaite mwauvaro mwira nramwutaa mwovano nrinero uiti tutoraqi kuankusa suku sia suqe si sukura pisorave. (Mwi kuankusava vasirero mwira ituvaqa mwira aqavaqa uiti ituvaqa aqavaqa nkuaa qarama vaisaro mwi kuankusara tavavano aasu sia mwitaama uiti tava votaama vairave.)

<sup>26</sup> Mwira nramwutaavano sia suqe si sukura mwira vutaqi pise vuvaro uitivano kuankusa vaqamase nkuaaqi kutero mwataqa tava riare suvanta mwira aira vaintivaravano takuovaro mwi kuankusava uiti vaqamase kute vauvanta <sup>27</sup> mwira aira vaintivaravano uro nraaso qora mwata rienta tinta, Nrora vaintio, re suqesi sukurave mwara tutaaro? Ntaintairove mwi kuankusava qovarama viso? tinta.

<sup>28</sup> Mwitaa tuvaro nraase qova tiro, Qike, ni nramwutaa mwovano kuankusa mwaqiro uro ni vutaqi mwara tutaaso, tuvanta mwira aira vaintivaravano mwira mwata rienta tinta, Sove te uro mwi kuankusara nuqi saanarave? <sup>29</sup> tuvaro mwiva qao tiro, Sia kuankusa mwira nuqi saate. Né kuankusa nuqitanta uiti vaqamasenta nauku sevorave. <sup>30</sup> Qaqi saivaro uitivanovaqa kuankusavanovaqa nkuaaqi nivuate. Uitivano nroravaqe ne ni sara irara mware nri mwai vaintisuara mwitaama tirenave. Né mwi kuankusara nane tuquse rumpase mwaqinta uro tia quara tenta mwiraqaantai uiti tuquse mwaqi ni sarasaapa nraavuqi uro nini mataate tiasarave, turave. Sisasiva mwi kuaqaa nuase timwa nyurama...

<sup>36</sup> Sisasiva mwo kua mwo kuaqaa nuase timwa nyiqiro viro mwiraqaantai mwiva nraase qora mwini se nraavuqi vuvanta mwira nraaqiaravaravano mwiva mwauraqi uro nenta Sisasirara tinta, Re ota tiana kuara mwira nramwutaavano kuankusa mwira vutaqi piso kuara mwi kuara osarara tiri timwa tivique te riaare, tinta.

<sup>37</sup> Mwira nraaqiaravaravano mwitaa tuvaro Sisasiva mwinravusua timwa nyiro tiro, Vainti mwovano suqe si sukura mwara tuto vaintira osaravano vairero ne mwiva mwauko. Ne mwataqi mwataai nraaqiarava ne mwi vaintivave.

<sup>38</sup> Mwi vaintira vuta osaravano vairero esaa mwatamaata vaiso. Suqe si sukura osaravano vairero Kotira kua raa nraase qorasuama mwariarave. Kuankusa osaravano vairero sia Kotira kua raa nraase qorasuama Saataanira nraaqiarama mwariarave. <sup>39</sup> Mwira nramwutaavano kuankusa suku piso vaintira osaravano vairero mwiva Saataanivave. Sara irara mware nri enara osaravano vairero naantiara mwaa mwatava taiqaari enava vaiso. Sara irara mware nri vaintisua osaravano vairero mwisua naavunyaa vaintinravuve.

<sup>40</sup> Mwira aira vaintivaravano kuankusa toqase rumpase mwaqinta uro tiaqi quara tonemase naantiara mwaa mwatava taiqaari enaraqaa mwitaama qovara sianarove. <sup>41</sup> Ne mwataqi mwataai nraaqiaravama mwaqi vina mwaa mwatava taiqaari enaraqaa ne naavunyaasua titaarinta mwisua untu ne naqisu mwataraqaantai sia suqe si nraase qorasua ni nraaqiaranravu sia suqema nyate mwari nraase qorasua rumpa mwarenta sia suqe si airara mware mwisua rumpa mwarenta ntaqinta <sup>42</sup> uro tia nrora itairiraqi pisaivanta mwisua tiaqi mwaitanta qara ninta nataqi vinta nyari vai nkutitanta mwaivarave.

<sup>43</sup> Mwisua mwini uro pisaivanta suqema nrue mwai nraase qorasua suarivano itainemase itamaqi vivaro Kotiva mwisua qova mwisuaqaa naqisiqi viranta mwiariqi vivarave. Ini aato vairere mwi kuara osara qintutama riaate, tiro. Sisasiva mwi kuara turama.

## 14

*Sisasiva nruka nroraqaa iquqaantai naaqi vura*

<sup>22</sup> Sisasiva mwisua sara nyitero mwiraqaantairo nrai vaintivara ntusi tiro, Né mpotuqi mwaari nenta né naane nramai nrukaqi tarenta tarasini uro né vi mwaivaqe ne vainti nraase qora ntusi tiarinta mwini nyari mwaqani nyari mwaqani vuata, tiro tuvo.

<sup>23</sup> Sisasiva mwitaa timwase mwiva vainti nraase qora nyari mwaqani nyari mwaqani ntusi tiro mwiraqaantai Kotirara sapara siase tiro mwera aataqaa vuvaro ena suvaro Sisasiva aataqaa mwinto nrariaraa mwauvaro <sup>24</sup> mpotuvano nramai vutaqaa vuvaro saaravano tuqi viro Sisasira vaintivaravano mpotuqi mwausua mwini vuarenta tinta sunantai saaravano tuqi vuvarora tiro, nramaivano mpotu sampi raaquqi raaquqi vurama.

<sup>25</sup> Saaravano tuqi vuvaro nramaivano mpotu raaquqi raaquqi vi mwauvaro va ataa suvaro Sisasiva nramaiqaa iquqaantai naaqi viro mwira vaintivaravano mpotuqi mwausua vunani vuvanta <sup>26</sup> mwira vaintivaravano takuovaro Sisasiva nramaiqaa iquqaantai naaqi nruvanta mwisua mwira takuenta nroraqamase aatu tinta mpo se tinta, Toveaanavanove, ti mwauvaro <sup>27</sup> Sisasiva mwisuara va tiro, Né qaqi mwarenta. Ne mwivave. Sia aatu siate, tiro tuvo.

<sup>28</sup> Sisasiva mwitaa tuvaro Pitaava tiro, Nrora vaintio, re qutaa mwairarere re ni timwa miqe nevaqa nramaiqaa niquqaantai re mwariaranani vuase, tiro. Pitaava mwitaa tuvaro Sisasiva tiro, So tukuane, tiro. <sup>29</sup> Mwitaa tuvaro Pitaava mpotuqintai mwaavi nero mpotu mwini pisero nramaiqaa iquqaantai naaqi viro Sisasiva sunani vurama.

<sup>30</sup> Pitaava mwini vitaro tiro, Ne so nramaiqaa vuasarave, timwa tero takuovaro saaravano nro-raqamase tuvaro Pitaava mwirara nau riovaro aatu itovaro mwiraqaantai mwiva nramaiqi mweva nare utura Sisasirara sapara siro tiro, <sup>31</sup> Mpo, nrora vaintio, ni tumwaraane, tuvaro Sisasiva va nrai saquqaantai mwiti Pitaara vite tiro, Re saaravano tuarinarara sia nau riaataarave. Re niara aasu nau riaataarave. Re sia niara taara aato tuataarave, tiro turama.

<sup>32</sup> Sisasiva mwitaa timwa sero Pitaara vita mware mpotuqi mwaari novaro saaravano va taiqa vuvanta mwira vaintivaravano mpotuqi mwausua Sisasirara riariamase tinta, Re qutaa Kotira mwaaquvano mwariaro, tinta turama.

## 26

*Sutaasiva Sisasira nramwutaa mwisua ntaquqi sero mono mwaraarirara tura*

<sup>14</sup> ...Sisasira 12 nraaqiaravaraqintai mwo vaintivano mwira utu Sutaasi Ikeriotiva mweva nero Kotira aira mwara mwate mwau vaintisua mwisua nrora vaintivaravano mwaunani viro uro mwisua mwata rie tiro, <sup>15</sup> Ne Sisasira ini ntaquqi uro saarinta né nara soqaave ni mivarave siavo? tuvanta mwisua ori mono 30 nravu saara nuase mwira mwuvaro <sup>16</sup> Sutaasiva mwi monora mware mwi enaraqaantai mwisua ntaquqi uro Sisasira saari aarara mpuaamaqi vura.

*Sisasiva nrai nraaqiara vaqamase vesasuto sarara nrora*

<sup>17</sup> Sia ntoto mpereti sarara omwata nre enanravuva nrinovanta ntaaru enaqaa mwira nraaqiaravara- vano Sisasiva sunani nrinenta tinta, Ntaraqive tenravu uro terama mwataarara re vesasuto enarara rietarama mwi sarara nrenarave? tinta. <sup>18</sup> Mwinravusua mwitaa tuvaro Sisasiva tiro, Nenravu Ierusalemi mwatusani uro mwi vaintirara mwitaa tiate, Tirinravu mwaara ti mwai vaintiva mwitaa tiro, Ni enama nrinaiiso. Ne nena nraaqiara vaqamasena ri nraavuqi vesasuto sarara nrenarave tiso, tiate, tiro. <sup>19</sup> Sisasiva mwitaa tuvanta mwira nraaqiaravaravano mwi sarara Sisasiva tunema senta temwanaama tora.

<sup>20</sup> Sara temwanaama tovaro ena suvaro Sisasiva nrai nraaqiaravaravaqa uro sara taintaqaa mwataqaa mwairo <sup>21</sup> sara nre mwariro tiro, Ne tiarinta riaate. Iniqintai mwovano nramwutaa vuqaa ni qovarama saanarove, tiro. <sup>22</sup> Mwitaa tuvanta mwira nraaqiaravara mwuntusa sia suqe suvanta mwinravusua nkuaiaqa Sisasira mwata rie tinta, Nrora vaintio, re niarave tiaro? Sia ne mwivave, sia ne mwivave, timwaqinta vinta.

<sup>23</sup> Mwitaa timwaqi vuvaro Sisasiva tiro, Nrai mpereti mwarase nivaqamase tanaaqi mwaati tumwaraariva mwi vaintiva ni qovarama saanarove. <sup>24</sup> Ni mwataqi mwatatai nraaqiarara niara ntaaru enaqaa mwitaa ni ruse kuara qumwaara ratorave. Mwi kuava mwivau vasianarove. Ni mwatani mwatatai nraaqiarara qovarama saari vaintirara ne mpo se timwa mwatauko. Mwira nrova sia mwira mwatataqe sove tiataarave, tiro.

<sup>25</sup> Sisasiva mwitaa tuvaro Sutaasiva mwira qovarama saariva Sisasira mwata riero tiro, Mwaara ti mwariara vaintio, re niarave tiaro? tuvaro Sisasiva tiro, Eo, re tianarave, tiro.

*Mpereti sararavaqa uaini nramairavaqa timwa tora*

<sup>26</sup> Sisasira nraaqiaravaravano sara nre mwauvaro Sisasiva mpereti sara mwarase Kotirara suqemave timwase uveqase nrai nraaqiaravara nyiro tiro, Mwaa sarara mwara nraate. Mwaa mperetiva ni mwavanama siso, tiro.

<sup>27</sup> Mwitaa timwase Sisasiva uaini nramai mwiraqi vasu kaapura mwarase Kotirara suqemave timwase mwinravusua viti nyiro tiro, Né esaa mwaa nramaira nraate.

<sup>28</sup> Mwaa nramaiva ni nraarema siso. Kotiva nraase qora vaqamase nkuaaqa naataruse mwairero qaraasa kua mwatarerove. Mwi kuava kempusaqama vasiarive tiro ni nraarevano mwi kuara kempusaqama saanarove. Ni rusaivaro ni nraarevano naariva vaqaqara nraase qora saisaqa sitaro mwisua sia suqe kua nrunka nyataaanarove.

<sup>29</sup> Ne tiarinta riaate. Mwaa enaraqaantai ne sia uaini nramai qava nrenarave. Ne sia nraraitina mwitaamaqi vuarinta né ni nkova naqisiariraqi nivaqa uro mwaivaqe ne mwi enaraqaa inivaqa mwaitana qaraasa uaini nramai nraasarave, tiro.

<sup>30</sup> Sisasiva mwitaa timwase nrai nraaqiaravaravaqa Kotirara isi timwase mwevane Orivi taaqiaqa vurama.

*Pitaava nrai kua tirero siarinara Sisasiva mwira timwa mwura*

<sup>31</sup> Mwinravusua mwini vuvaro Sisasiva mwinravusua timwa nyiro tiro, Nenravu mwate enaqi ni mwaini sentama aatumaqi sanenta vivarave. Kotira vukuqi qumwaara rato kuava mate mwivau vasianarove. Mwitaa tiro:

Sipisipiqaq naqisiari vaintira  
Kotiva mwira nuqutu sairanta

sipisipi mwisua aatumase nyiariara nyiariara  
sampi mwona mwona vivarave, turave.

<sup>32</sup> So naantiara ni mwara qaqi ntivima saqe ne mwarina ini vuni ne naane Kariri mwatani virenave, tiro.

<sup>33</sup> Sisasiva mwitaa tuvaro Pitaava qao tiro. Esaa mwinravusua ri mwaini senta aatumase sanama tenta vivaqe ne aasu rivaqa mwariasarave, tiro.

<sup>34</sup> Pitaava mwitaa tuvaro Sisasiva tiro, Ne tiarira re riaane. Mate enaқи kukoraaravano sia qukarairara re taaramo nrau niara tira sia mwi vaintira takuaukavave tinarave, tiro.

<sup>35</sup> Sisasiva mwitaa tuvaro Pitaava qao tiro, Ne sia riara sia mwira takuaukavave tiasarave, tiro. Pitaava mwitaa tuvanta Sisasira nraaqiara mwonravuvanovaqa mwi kuara aasu tura.

*Sisasiva Kotirara uro sapara sura*

<sup>36</sup> Mwiraqaantai Sisasiva nrai nraaqiaravaravaqa mase uro viro saqava tutoraқи mwira utu Kesemani mwiraқи urone nrai nraaqiaravarara tiro, Nenravu mwaini mwataqaa mwaivaqe ne mwuruni uro Kotirara sapara siasa, timwase <sup>37</sup> Pitaaravaqa, Sepetira mwaaqutanavaqa, mwinravusua aasu ntita mware mwini vitaro sia suqe aato riovoro mwira mwuntusavano sia suqe suvaro <sup>38</sup> mwiva taaramonravuara tiro, Ni mwuntusavano nroraqamase nitampiso ni rusarero votaama vasisana mwauko. Nenravu mwaaqaa mwaitanta ni vaqamase mwaitanta vu mpairase takuetanta mwariate, tiro.

<sup>39</sup> Mwitaa timwase Sisasiva sia muasaaqama vire uro vuriantai mwataqaa untu niro Kotirara saparamase tiro, Mpo ni nko, re sove tirere ne nitampi nramaira nraarira votaa re mwi nramaira qaқini mwara saane. So sia ne nena mwarataaraqaa mwararenave. Ne re mwaraase tinaravaqa mwararenave, tiro.

<sup>40</sup> Sisasiva mwitaa timwase uro nane nrai nraaqiara taaramonravu sonani untu takuovanta mwinravusua vu ruara suvanta vaite mwauvaro Sisasiva Pitaarara tiro, Naraqamave ne taaramonravu ni vaqamase pataqa mwaritanta sia vu mpaia senta takuetanta mwariavo? <sup>41</sup> Ininravuara mwinravusua sia suqe aira mwaraate tiro, Saataaniva ininravu amaqe siasorave mwirara rietanta ne vu mpairase takuetanta Kotirara sapara si mwariate. Ininravu mwananavano mwitaa siataa sisaro ini mwavanavano aasu sia so kempusaqa sisanta mwariavo, tiro.

<sup>42</sup> Sisasiva mwitaa timwase qava taaramonravu mwini se uro qava Kotirara saparamase tiro, Mpo ni nko, mwaa kaapuraқи vasi nramaira sia re qaқini mwara saraitira niara mwira qaқи nraane tirere, ne re mwarataaraqaa mwarasave, tiro. <sup>43</sup> Sisasiva mwitaa timwase qava uro nane untu takuovanta mwira nraaqiara taaramonravu vu ruara suvanta vaite mwaura.

<sup>44</sup> Mwinravusua vaite mwauvaro Sisasiva qava mwinravusua mwini se uro vi Kotirara taaramo nrau sapara siro ota tunemase nkuaa qaromase Kotirara saparama sora.

<sup>45</sup> Kotirara saparama taiqase Sisasiva uro nanero untu taaramonravuara tiro, Mpo, nenravu qaқи sositantave vaitaavo? Ni mwataқи mwatatai nraaqiarara ni navaatavu mwarenta uro sia suqe si airara mware mwaisua mwisua ntaquқи ni sevarave. <sup>46</sup> Ntivivaqenravu vuare. Ni govarama saari vaintiva nri mwaiso, tiro...

*Iutaa vaintinravu ntuqaa Sisasira uro sora*

<sup>56</sup> ...Sisasiva mwitaa tuvanta mwisua mwira navaatavu sovanta mwira nraaqiaravaravano mwira mwini senta nyiari aatu vurama.

<sup>57</sup> Mwira nraaqiaravaravano sane vuvanta Sisasira navaatavu sosua mwira vita mware Kotira nraavuқи aira mware mwaisua mwisua vunyaa vaintivano mwauraқи Kaiapaasira nraavuқи uro sovanta mwi nraavuraқи mwaara osara ti mwau vaintivarsuavaqa, Iutaa vainti nroranravuvanovaqa, suntu nukaama mwaura.

<sup>58</sup> Sisasira vita mware uro se mwauvaro Pitaava niarantai mwisua ntataқи viro Kaiapaasira nraavu mwatusani urone tosani mwaantine vutaқи viro mwi irinarava qovara siarira takuarero uro mwi nraavuraqaa vaivaraara naқisi mwau vaintisua vaqamase mwataqaa mwairo mwaura.

<sup>59</sup> Pitaava mwini mwataqaa mwauvanta nraavuқи Kotira nraavuqaa naқisi mwau vaintisuavaqa, esaa mwiraқи suntu nukaama mwau vaintisuavaqa, mwisua Sisasira rusaranta Sisasiraqaa muna kua mwataare tuvaro <sup>60</sup> sia mwi kuava vauvanta qumina mwi kuara mpuaasitanta mwo vainti mwo vaintivano ntivinta Sisasirara muna kua tura. Mwitaamaқи aasu vuvanta mwiraqaantai vainti taaratanavano ntivinta <sup>61</sup> Sisasirara tinta, Mwaa vaintiva mwitaa tisanta tetana riaunarave. Mwiva tiro, Ne soma Kotira nraavu mpaia sena mwiraqaantai taaramo ena aasu mwarina mwi nraavura qava soqa taiqa saasarave, tisanta riaunarave, tinta.

<sup>62</sup> Mwitana mwitaa tuvaro Kotira aira mwara mwate mwau vaintisua mwisua vunyaa vaintivano ntiviro Sisasirara tiro, Mwitaa mwitaama riqaa kua mwate mwariavo? Re mwo? Re nyaritanara narave tinarave? tuvaro <sup>63</sup> Sisasiva sia kua tiraitiro, tire mwauvaro qava vunyaa vaintivano Sisasirara tiro, Ne Kotira vuqaa mwaina mwira utu netana riaroma gutaa kua tiane tuko. Qutaave Kotiva ri vusitisarave re tiri saisaqa sirera Mesaia vaintivano mwariavo? Qutaave re Kotira mwaaquvano mwariavo? Re tiri timwa timwiqe riaare, tiro.

<sup>64</sup> Mwiva mwitaa tuvaro Sisasiva tiro, Re tianara ne mwaa mwivave. Ne tiarinta né riaate. Né naantiara takuivaqe ne mwataqi mwatatai nraaqiarava nroraqama vina Kotiva kempusavano mwariarinani mwira saqu tanaranani mwataqaa mwaitana iravuqi tukusarave, tiro.

<sup>65</sup> Sisasiva mwitaa tuvaro Kotira aira mwara mwate mwasua mwisua vunyaa vaintivano nrai tuavaaqa nuqeqaamase tiro, Mpo mwiva Kotira vuqaa mwaitaro sia suqe si kuara aasu tiso. Mwo vaintivano mwiraqaa kua mwataarira qumina aasara nevorave. Takuuate, né vaa riaavaro mwiva Kotira vuqaa mwaitaro sia suqe si kuara tiso. <sup>66</sup> Mwira saara né Sisasirara nara kuave tivarave? Né tivaqe riaase, tiro.

Mwitaa tuvanta mwisua tinta, Mwira sia suqe airavano virintoma vaiso. Mwira saara mwira ruseva aasu vaiso, tinta. <sup>67</sup> Mwisua mwitaa timwase uro Sisasira vuriqi taara visise mwisua nyai saquqaantai mwira nuqutuse mwira vu aato nuqutuse mwisua mwira mwoqanya kua tinta, Mesaia vaintio, qutaa re kua govarama sera vaintiva mwairere sia takuaraitira ri nuqutuari vaintira utu tiqe te riaare, tinta tura. <sup>68</sup>

*Pitaava Sisasirara sia mwira takuaurave tura*

<sup>69</sup> Nraavuqi ko timwaqinta vi mwauvaro Pitaava mwaatani mwatusaqaa mwataqaa mwauvaro aira nraase mwovano Pitaara aaqani viro mwirara tiro, Revaqa Sisasira mwaata Karirinyaavama mwariaro, tiro.

<sup>70</sup> Mwiva mwitaa tuvaro Pitaava mwisua ntuqaa mwaitaro qao tiro, Re tiana kuara sia ne mwira qintuta surave, tiro. <sup>71</sup> Mwiva mwitaa timwase uro tosa qentana mwauvaro aira nraase mwovano Pitaara takuero mwiraqi ntivi mwasua timwa nyiro tiro, Mwaa vaintiva Sisasira Naasaretinyaara vaqamase mwaivave, tiro.

<sup>72</sup> Mwitaa tuvaro Pitaava saqu iqiqa se tiro, Sia ne mwi vaintira takuaurave, tiro. <sup>73</sup> Mwitaa timwase sia muasaqama mwauvanta mwiraqi ntivi mwasua Pitaava mwaunani uro nenta mwirara tinta, Sisasira nraaqiaravaravano mwi mwatanaasua mwariavara qutaama revaqa nkuua mwi mwatanaava aasuma mwariaro. Mwisua tiri kua kuantase tianemase revaqa kuantase ti mwariaro, tinta.

<sup>74</sup> Mwisua mwitaa tuvaro Pitaava qava saqu iqiqa se tiro, Ne sia qutaa kua tiariro Kotiva soma ni nuqutu saanarove. Ne qutaa tuko. Né ti mwaria vaintira sia ne mwira takuaurara né tiavo, tiro. Pitaava mwitaa tuvaro vaa kukoraaravano qukarora.

<sup>75</sup> Kukoraaravano qukarero suvaro Pitaava mwiraqaantai Sisasiva timwa mwi kuara riero. Sisasiva mwitaa turave. Kukoraaravano sia qukarairara re taaramo nrau niara tira sia ne mwira takuaurave tinarave tu kuara Pitaava riatero mwiva mwaaqani vuvaro mwira mwuntusavano sia suqe suvaro mwiva nroraqamase natora.

## 27

*Sisasira qunama tora*

<sup>57</sup> Ena suvaro Arimatianaava vaaqara irainara mwato vaintiva uro ne. Mwira utu Sosepiva mwiva Sisasira nraaqiaravano mwaura. <sup>58</sup> Mwi vaintiva uro ne Pairaativa mwauraqi uro Sisasira mwavana miqe mwaqina qunama taase tuvaro Pairaativa nrai naqu vaintisua titero Sisasira mwavana mwira mwiate tuvaro <sup>59</sup> Sosepiva uro Sisasira mwavana satarigaantai itu mwataqaa se qaraasa vaaqa tasuqu vaaqara mwarase mwira nraavumase <sup>60</sup> mwaqi untu nrai naantiara qutu vuarinarara rietaro ori ukutoraqi mwira mwate nrora ori mwo mwira raapuqi vi ori ukutora mwira oqaa suvaite mwini se vuvanta <sup>61</sup> Mariaava Makataaranyavavaqa, mwira kokova mwo Mariaavavaqa, mwitana mwataqaa mwauvaro mwutu mwatani Sisasira mwiraqi qunamato oriva vaura.

## MAAKI

### 4

*Vaintivano sara suku pisaqi vurara tura*

<sup>1</sup> Sisasiva nruka tosani uro mwariro nraase qora mwasaasa timwa nyiase tuvanta nraase qora vaaqaravano ntunu nukaama mwainta mwira ututuma sovarora tiro, Sisasiva pisero mpotuqi uro mwaari nero mwiraqi mwataqaa mwairo nramaiqaa mwauvanta nraase qoravano mwutuni nramai tosana mwaaura.

<sup>2</sup> Mwisua nramai tosana mwataqaa mwauvaro Sisasiva mwo kua mwo kuaqaa nuase tiro timwa nyura.

<sup>3</sup> Sisasiva tiro, Ne tiarinta riaate. Vainti mwovano sara suku pisarero vurave. <sup>4</sup> Mwiva sara suku pisaqi uro vuvano sini sukuvano aara tosani untu nuvaro kurivano mwiri mwira nramwa sorave.

<sup>5</sup> Mwitaa suvaro sara suku mwonravuvano ori mwataqaa untu nuvaro mwatavano sia mwevaniqama vau mwatava vasuvarora tiro sukuvano untu niro vaavaama kutovaro <sup>6</sup> suarivano nrinero itamaqi viro aasaraqama sovaro mwira tuqavano sia mwataqi mwevani vurara tiro, aasarama urave.

<sup>7</sup> Mwitaa suvaro sara suku mwonravuvano kuankusa kutoraqi untu niro kuankusa vaqamase nivuvaro kuankusavano suku mwira numwaqu sovaro sukuvano sia tava riorave.

<sup>8</sup> Mwitaa suvaro sara suku mwonravuvano suqe su mwataqaa untu niro suqemaseniviro uro suqema tava riatovaro sini suva mwira aatarase niviro uro suqe tava vaaqara tava riatovaro sini suva mwira aatarase niviro uro suqe tava vaaqara tava riatorave, tiro.

<sup>9</sup> Sisasiva mwi kuaraqaa nuase timwa taiqase tiro, Ini aato vasirente mwi kuara qintutamase riaate, tiro.

<sup>10</sup> Sisasiva kua timwa nyi taiqa sovanta nraase qoravano nyiari mwaaqa nyiari mwaaqa vuvano Sisasiva nraria mwauvanta mwira nraaqiara 12 nruvuvanovaqa mwo susuavaqa Sisasiva mwauvanti nrinenta Sisasiva mwi kuaraqaa nuase tu osarara sia qintutama siraitinta, mwisua Sisasira mwata riovoro <sup>11</sup> Sisasiva mwisua timwa nyiro tiro, Kotiva nraase qoraqaa naqisiari kuara qumpau tai kuara mwi kuara Kotiva iniara qaqi sairanta mwi kuara osara riaate timwase mwiva qaqi nraase qora qaqini mwaisua mwi kuara osara sia qintutama sera timwa nyiane tisana ne mwi kuaraqaa nuase mwisua timwa nyitana sia mwi kuara osara mwisua timwa nyuko.

<sup>12</sup> Ne mwo kuaqaa nuase tiarinta nraase qoravano rientama sia qintutamase rievareve.

Mwisua ni kuara aato tarase sia qintutamase rievareve.

Mwisua nyiari sia suqe si airara qaqira pisaisarove

Kotiva mwisua nyiari sia suqe si airara

mwara kuara nukaama nataanarove, tiro.

<sup>13</sup> Sisasiva mwitaa timwase mwinravusua tiro, Né mwo? Ne mwi kuaraqaa nuase tu osarara né siave qintutama riaavo? Né sia mwi kuara osara qintutama riaraitinta naantiara ne mwo kuaqaaqaa nuasena tiari kuara né ntataama senta so qintutamase rievareve? <sup>14</sup> Ne ota mwi kuaraqaa nuase tu osarara ini timwa nyireneve.

Vaintivano sara suku mwataqi pisora mwi kuara osara vairero Kotira kuama vaiso.

<sup>15</sup> Sara sukuvano aaraqaa untu nora mwira osara vairero vainti nraase qora mwonravuvano mwi sukura votaama mwariasuave. Mwi vainti nraase qorasua Kotira kua riaavaro Saataaniva nrinero mwisua vu aato mwuntusaqintai mwi kuara navisi mwarairave.

<sup>16</sup> Ori mwataqaa untu ni sukura osara vairero nraase qora mwonravuvano mwariasuave. Mwinravusua Kotira mwasaasa rienta mwi kuarara riariamasemwariavaro <sup>17</sup> kuavano sia mwisua mwuntusaqi visanta mwi nraase qorasua sia mwi kuara mwo nrau mwo nrau riaraitinta mwariavanta, mwi kuara saara mwo siasua mwisua sia suqema utu nyatara siavanta mwisua tiri riorave tinta Kotira kua vaa qaqira pise mwaria vainti nraase qorasua mwarairave.

<sup>18</sup> Nraase qora mwonravuvano kuankusa kutoraqi piso sukura votaamase mwariasuave. <sup>19</sup> Mwi nraase qorasua Kotira kua rienta mwiraqaantai mwisua mwataqaa irainarara nroraqamase riqainta vintanta monorave mwo irainararave riariamaqi vitanta mwo irainara mwo irainara mwararenta riqainta vinta Kotira kua qaqira pisaavaro Kotira kuavano sia mwi nraase qorasuaqi vaisanta mwarairave.

<sup>20</sup> Mwisua mwitaa siavanta mwo vainti nraase qoravano suqe mwataqaa untu ni sukura votaama mwariasuave. Mwi nraase qorasua Kotira kua rienta mwi kuarara qutaave tinta mwi kuara riqainta vinta suqe aira Kotirani mwaqi vuarave. Mwisua sininravuvano Kotira kua rietanta aatarase suqe aira Kotirani mwaqi vinta mwariavanta sini nruvuvano mwisua aatarase suqe aira Kotirani mwaqi vinta mwariavanta sini nruvuvano mwisua aira aatarase suqe aira Kotirani mwaqinta vuarave, tiro. Sisasiva mwi kuara turama.



## 5

*Sairasiva Sisasira uro vitora*

<sup>21</sup> ...Sisasiva mpotuqi viri nane nrukaqi tare sinyaa tarasini vuvanta mwini nraase qora vaaqaravano suntu nukaa nukamase Sisasiva mwaunani ututuma mwauvaro <sup>22</sup> vainti mwovano mwi mwatusaraqi mwaara nraavuqaa naqisi mwauva Sairasiva mwiri nriri Sisasira takue uro mwira iqutarani untu niro <sup>23</sup> mpo se tiro Sisasirara tiro, Ni naavuravano qutuariva mwataqa vaiso. Revaqa vaa nritara rena saqu mwiraqaa mwatairaro mwira qaravano taiqairaro so qaqi mwariarive, tiro. <sup>24</sup> Mwi vaintiva mwitaa tuvaro Sisasiva mwiravaqa vura.

<sup>35</sup> ...Sisasiva mwiravaqa aarana vi mwauvanta vainti mwonravuvano Sairasira nraavuqintai nritanta Sairasira vitenta mwirara tinta, Mpo, ri raavuravano qutu viso. Mwaara ti mwai vaintira re sia navaata vuane, tuvaro <sup>36</sup> Sisasivavaqa mwinravusua kua riero mwaara nraavuqaa naqisu vaintirara tiro, Sia aatu siane. Re niara nroraqamase riaane, tuvo.

<sup>37</sup> Sisasiva mwitaa timwase mwiva Pitaaravaqa, Semisiravaqa, Semisira qata Soniravaqa, mwinravusua aasu ntita mware <sup>38</sup> uro Sairasira nraavuqi uro takuovanta vainti nraase qoravano nroraqama senta mpo tinta nate mwauvaro <sup>39</sup> Sisasiva nraavuqi mwaari nero tiro, Narare né nate mwariavo? Mwi kuaasiva sia qutu viso. Mwiva qaqi vaite mwaiso, tuvo. <sup>40</sup> Sisasiva mwitaa tuvanta mwisua Sisasiva tu kuarara qaqi aaritaru suvaro Sisasiva esaa nraase qora raaqu mwaqaani se kuaasi mwira nrosua qosuavaqa, taaramonravu nraivaqa nrusuavaqa, Sisasiva mwinravusua aasu ntita mware kuaasivano qutu vunani uro <sup>41</sup> mwira saqu tuarere nrai kuanantai tiro, Tarita kumi - mwaa kuaasio, ne riana nti vuane tuko, tiro. <sup>42</sup> Sisasiva mwitaa tuvaro mwi kuaasiva vaa ntiviro nruu mwauvo. Mwi kuaasiva 12 isi mwarasova ntiviro viro nriri mwauvanta mwinravusua mwira takuenta mpo mpo tinta saqu nunkinkiraara tenta sinta mwauvaro <sup>43</sup> Sisasiva mwinravusuara rora siro tiro, Né mate takuaa airara sia mwo vaintivaqa timwa nyiate. So mwaa kuaasirara sara aasu mwiate, tuvo. Sisasiva mwi kuara turama.

## 6

*Sisasiva pata sara vaaqara vaqamase nura*

<sup>31</sup> Mwo ena vaaqara nraase qoravano Sisasira takuarenta vitare nritare si mwauvanta Sisasivavaqa nrai vaintivaravaqa sia so sara nrarenta qaqi mwauvaro Sisasiva mwitaa tiro, Vivaqenravu sia vaintivaqa sisanta uro mwariare, tiro. <sup>32</sup> Mwitaa timwase nrai vaintivaravaqa ntitero mpotuqi mwaari nero nramai nrukaqi tarero qumina santa virero vura.

<sup>33</sup> Mwinravusua mwini senta vuvanta vaaqara nraase qoravano mwinravusua takuenta mwinravusua mwini virenta sunaniara rienta mwo mwatusaqi mwo mwatusaqintai mwisua sanenta nramai nruka tosanata mwata nuna sanenta uro Sisasiva vuase tunaniara mwisua nanenta uro nenta.

<sup>34</sup> Mwisua nanenta uro novaro Sisasiva uro ne mpotuqintai mwataqi mwaavi ne takuovanta nraase qora vaaqaravano nukaa sinta mwauvaro Sisasiva mwisuara mpo tiro mwitaa tiro, Vaintivano sia sipisipiqaa naqisi mwarisanta sipisipivano nyariara sampi nruu mwaria sipisipisua mwisua votaasua mwaa nraase qorasuavaqa sampi nruu mwariavo, tiro. Mwitaa timwase Sisasiva mwinto mwaitaro mwisua mwo kua mwo kua timwa nuvo.

<sup>35</sup> Sisasiva kua tiaqi vuvuro suarivano tukiro vuvanta Sisasira vaintinravuvano mwirara tinta, Mwaini qumina mwasantave. Ena siaso. <sup>36</sup> Re nraase qora ntusi tiranta mwisua mwo mwatusa mwo mwatusa nruenta ori ninta sara mwarate. Mwisua sia saravaqa mware nriasuave, tuvo.

<sup>37</sup> Sisasira vaintinravuvano mwitaa tuvaro Sisasiva qao tiro, Néntavano sara mwisua niate, tiro. Mwitaa tuvanta mwinravusua qao tinta, Te nrora orive 200 kinaave sove ninta sara mwasenta mwisua niaraarave? tuvo.

<sup>38</sup> Mwisua mwitaa tuvaro Sisasiva nrai vaintinravu mwata riero tiro, Nara nara mpereti sarave vaiso. Né uro takuaate, tiro. Mwitaa tuvanta mwinravusua uro takuenta Sisasira timwa mwinta tinta, Mpereti sara nkuaa saquru aasu vaiso. Tavusa taarama aasu vaiso, tuvo.

<sup>39</sup> Mwinravusua mwitaa tuvaro Sisasiva nraase qorara tiro, Né esaa musau santa mwataqaa mwariate, tiro. <sup>40</sup> Mwitaa tuvanta mwisua mwo santa 50 nravuvano mwataqaa mwauvanta mwo santa 100 nravuvano mwataqaa mwauvanta mwitaamaqi vinta tinta esaa nraase qoravano mwataqaa mwauvaro <sup>41</sup> Sisasiva mpereti nkuaa saquru mwase tavusa taarama mwase naavuni takueto Kotirara saparamase sarara suqemave, tiro. Sisasiva mwitaa timwase mpereti sara uveqase mwiva nrai vaintinravu niro tiro, So né sara mwarenta uro mwisua nivanta mwisua esaa nraate, tiro. Sisasiva mwitaa timwase mwiva tavusa taaramavaqa mwase airase nyuvo.

<sup>42</sup> Sisasiva mwi sarara nrai vaintivanravu nyuvanta mwinravusua uro nraase qora nyuvanta mwisua esaa so nrorama. <sup>43</sup> So nrovanta Sisasira vaintinravuvano mwiraqaantai vunato tuara nrora tua mwarenta uro nraase qoravano mperetivaqa tavusavaqa nretanta viti piso sarara suntu senta nrora tua 12 nravu ntunu senta kuraama sorama.

<sup>44</sup> Mwi enara 5000 qoravano mwi sarara nrovanta nraase vaaqaravanovaqa mwi sarara nrorama...

## 10

*Sisasiva Vatimiasira vu mpaيرا sora*

<sup>46</sup> Sisasiva nrai vaintivaravaqa viro Seriko mwatusani uro viro mwi mwatusara aatarero vire suvanta nraase qora vaaqaravano mwira vataqinta vi mwauvaru vu qimpa vu vaintiva Vatimiasira Timiasira mwaauquvano mwaro mwitaa su irainarara naaru tiro miate ti mwau vaintiva aara tosani mwataqaa mwairo.

<sup>47</sup> Mwira mwini mwaitaro Sisasiva Nasaretinyaava nritaraairara riero mwiraqaantai mwiva nro-raqamase Sisasirara saparamase tiro, Siasio, Ntevitira mwaaquo, re niara mpo tiane, tuvo. <sup>48</sup> Vu qimpa vu vaintiva mwitaa tuvanta nraase qora vaaqaravano mwirara irora tinta, Re o suvaitaane, tuvoro mwi vaintiva sia mwisua kua riarero qava nroraqamase saparamase tiro, Ntevitira mwaaquo, niara mpo tiane, tiro.

<sup>49</sup> Vatimiasira mwitaa tiaqi vuvaru Sisasiva mwiraqaa ntiviro mwairo tiro, Sapara sivaro nriarive, tuvanta mwisua vu qimpura saparamase tinta, Re riarimase mwariane. Nti vuane. Mwiva ri sapara siso, tinta.

<sup>50</sup> Mwisua mwitaa tuvoro vainti mwiva nrai vaaqa utora raaqu qaqini se ntiviro Sisasiva ntivi mwaunani vuvaru <sup>51</sup> Sisasiva mwira mwata riero tiro, Ne ri ntataa siase tukare re nriaro? tuvoro vu qimpa vuvu tiro, Mwaara tiara vaintio, re ni mpu mpaيرا saane tina nrukavave, tiro.

<sup>52</sup> Mwitaa tuvoro Sisasiva tiro, Re so vinarave. Re niara mwiva so ni saisaqa sianarove tiararoma ri vuvano suqema viso, tiro. Sisasiva mwitaa tuvoro mwira vuvano mpaيرا vuvaru mwi vaintiva so takuora. Mwiva so takuova Sisasivavaqa mase aarana vura.

## 12

*Uaini sana mwara tutoraqa sia suqemase naqisu vaintisuara tura*

<sup>1</sup> Sisasiva mwitaa timwase mwo kuaqaa nuase mwisua timwa nyiro tiro, Vainti mwovano uaini sana mwara tute tosani urisa rate mwata qukuse uaini tava tatarira ututuse vaivaraara tainta utute mwate niarani mwo mwatani virero siro mwo susua timwa nyiro tiro, Né ni uaini vutaqaa ninani naqisi matenta né sini uaini tava siqisenta nénta mwaretanta sini uaini tava mwara ninani mataate, tiro. Mwitaa timwase mwiva niarani mwo mwatani vurama.

<sup>2</sup> Mwini uro mwauvaru uaini tava siqu enava nrinovaro mwiva nrai aira vainti mwo titero tiro, Re uro ni nraasoqaa naqisi mate mwaisuara tiranta uaini tava ninanivaqa siqi mataate, tuvoro <sup>3</sup> mwira aira vaintivano mwini vuvanta mwira nraasoqaa naqisi mwate mwau vaintisua mwira aira vainti navaatavu senta saavuqaantai mwira nuqutuse mwatenta sia uaini tava siqi mwiraitinta, qaqi mwira titovaro uro nane vura.

<sup>4</sup> Qaqi uro nane vuvaru nraaso qova nrai aira vainti mwo titovaro vuvanta mwira nraasoqaa naqisi mwate mwaisua mwira aira vainti qiata rasenta sauri irainara mwurama. <sup>5</sup> Mwitaa suvaro nraaso qova nrai aira vainti mwo titovaro vuvanta mwisua mwira rusenta. So mwitaamaqi vinta sini mwira aira vainti titosua saavuqaantai nuqutusementa sini rusorarama tina. <sup>6</sup> Mwira aira vaintinravu taiqa sovaro vainti nkuaiqa aasu mwaura. Mwi vaintiva nraaso qora mwaauquvano mwauvaru mwira qova nrai mwaauquara mwuntusa nuvaru mwau vaintiva mwauvaru mwira qova mwiravaqa naantiara esara titero tiro, Mwisua ni maaqu takuenta niara mwira mwaauquve titanta mwira suqema mwatevarave, tiro.

<sup>7</sup> Mwitaa timwase nrai mwaaqu titovaro mwini vuvanta mwira nraasoqaa naqisi mwate mwau vaintisua mwira mwaaqu takuenta nrai timwa mwi nrai timwa mwinta tinta, Mwira qova qutu viroro mwaa vaintiva nrai qora mwatavaqa mwitaa irainaravaqa mwaraarivama mwaiso. Mwarivaqe te mwira rusaaroro mwira mwarare siari irainarava tirini aasu vasiarive, tinta. <sup>8</sup> Mwisua mwitaa timwase mwira mwaaqu navaatavuse ruse mwaatani mwaatani mwira pisorave, tiro.

<sup>9</sup> Sisasiva mwitaa timwase mwiva nraase qora mwata rie tiro, Mwisua mwitaa surara tiro, nraaso qova nrai mwaaqu rusorara ntataave sianarove? Nraaso qova nrine nrai nraasoqaa naqisi vaintisua ru taiqase mwonravuara tiro, Né ni nraasoqaa ninani naqisi mataate, tianarove. <sup>10</sup> Né siave Kotira vukuqi mwaa kuara saara nitanta riaavo? Mwi kuava mwitaama tiso:

Ori nraavu utitanta mwo oriara  
sia suqe orive timwase qaqira pisaa oriva  
mwi oriva pusa oriqama viso.

<sup>11</sup> Kotiva mwi orira mwarase nroraqama sairara tinta, te Kotira aira takuetanta suqe airave turo, turave. Kotira vukuqi mwitaama qumwara torave. Né siave mwi kuara qumwara tetantave qintutama riaavo? tiro.

<sup>12</sup> Sisasiva mwitaa tuvanta lutaa nrora vaintivaravano qintutama riovaro Sisasiva uaini vutaqaa nraqisi mwato vaintisuara titaroma mwiva mwisuaqaa nuase tuvanta mwisua Sisasira navaatavuse ko mwiare timwatenta nraase qoravano mwiraqi suntu nukaa nukasusua tiri irora sivo tinta mwisua aatu tinta sia Sisasira navaatavu saraitinta, qaqira pisenta vurama...

## 15

*Sisasiva Pairaativa mwaunani vitaqinta uro sora*

<sup>1</sup> Mwi qararaara toqaqi Kotira aira mwara mwatate mwau vaintisia mwisua nrora vaintivaravaqa, lutaa nrora vaintivaravaqa, mwaara osara ti mwau vaintisuavaqa, esaa kaanasori vaintivaravaqa, mwisua suntu nukaama vinta mwaitanta mwisua tiare tu kuara suntu nukaama mware Sisasira seni sanaqaantai mwira rumpa mware Pairaativa kamaanira nrora vaintivano mwauraqi uro sora.

<sup>2</sup> Uro sovaro Pairaativa Sisasira mwata riero tiro, Qutaave re lutaa mwatanyasua ntaarunya vaintivano mwariaro? tuvaro Sisasiva tiro, Re tiarava ne mwaa mwivama siso, tiro. <sup>3</sup> Mwitaa tuvanta Kotira aira mwara mwate mwau vaintisia mwisua nrora vaintinravu mwo kua mwo kua saara Sisasira irora si mwauvaro <sup>4</sup> Pairaativa mwisua kua rietaro qava Sisasira mwata riero tiro, Re siave nyarivaqa tinarave? Mwisua vaaqara kua saara ri irora si mwariavo, tiro.

<sup>5</sup> Mwitaa tuvaro Sisasiva qava kempusaqamase sia kua tiraitiro mwauvaro, Pairaativa vaaqara aato ti mwaura.

*Naqu vaintisia Sisasira kuaaritarama mwatenta mwira nuqutura*

<sup>16</sup> Pairaativa nrai naqu vaintisia ntaquqi Sisasira pisovanta mwisua mwira vitaqi uro kamaanira nraavuqi se mwisua nyiari sena naqu vaintisia esaa sapara sinta suntu nukaama mwainta <sup>17</sup> Sisasirara mwoqanyaa kua tinta ntaarunya vainti vaaqa votaa sura rumpa mwataare tinta nraare vaaqa rumpa mwatenta mwiraqaantai quki sana mwarase qututumase ovaqa votaamase Sisasira qiataqaa qumwa tenta <sup>18</sup> munaqamase mwisua nyiari ntaqu vuriiqaa mwatetanta muna kua timwa mwinta tinta, lutaa mwatanyaa ntaarunya vaintio, re mwarirave? tinta. <sup>19</sup> Mwitaa timwase mwisua saavuqaantai Sisasira qiata nukavusenta mwiraqaa taara visise mwira vuqaa tori naquntanenta muna riarisianta mwaura.

<sup>20</sup> Mwitaaqainta vitanta mwira nuqutu senta aaritara sinta taiqase mwiraqaantai mwisua nraare vaaqa rumpa mwatora avanuse Sisasira nrai tuavaaqa utu mwatenta mwira satariqaa niri rutenta siritarenta Sisasira vita mwarenta vurama.

*Sisasira satariqaa niri rutenta siritora*

<sup>21</sup> Naqu vaintinravusua Sisasira satariqaa niri rutenta siritarenta sitanta mwira vitaqi mwatusa mwaaqani aarana vi mwauvaro vainti mwovano mwira utu Saimoniva mwintairo nrora mwatusani virero suvanta mwisua mwirara kempusaqamase tinta, Sisasira satari re mwara qu mwarera uro mwataane, tuvaro Saimoniva mwira satari mwara qu mwarero uro mwatora. Saimoniva Sairini mwatanyaa mwiva Arekisantasua Rupusua mwitana qovama mwaura.

<sup>22</sup> Mwisua Sisasira vitaqi uro qumina santa Korokotave tunani sora. Korokota mwaa kuaaraintai tirenta, Qiata Mwusaari santave, tunani Sisasira uro se <sup>23</sup> uaini nramai mwiraqi sunkavu irainara kuantase mwato nramaira mwira mwirenta suvaro Sisasiva sia nrora.

<sup>24</sup> Sia nrovanta mwisua mwira satariqaa niriqaantai rutenta mwira tuavaaqa mwarase ntasua ntasua so mwarevarave timwase mwisua kaati ruanema setanta ori pisetanta Sisasira tuavaaqa ntusamase mwarora.

<sup>25</sup> Toqaqi suarivano mamatama vauvanta Sisasira satariqaa rutora. <sup>26</sup> Mwira satariqaa rutenta Sisasira qiatani kua mwo mwira ko timwa mwato kuara qumwaara ratenta satariqaa rutovaro mwi kuava mwitaama tiro, MWAA VAINTIVA IUTAA MWATANYAASUA NTAARUNYAA VAINTIVE, tiro. Mwi qumwaarava mwitaama vaura.

<sup>27</sup> Mwisua Sisasira satariqaa rutentanta Sisasiravaqa vainti taaramavaqa rutovanta mwitana muara mware mwausua mwauvanta mwisua vainti mwo Sisasira saqu tanaranani niri rutenta vainti mwo Sisasira saqu saantotanani niri rutora. <sup>28</sup> (Sisasiravaqa mwitanavaqa rutorara tiro, Kotira vukuqi kua mwo qumwaara tova mwiva qovara sura. Mwitaama tiro: Mwiva sia suqe si vaintisia vaqamase mwarianarove, tinta.)

<sup>29</sup> Mwitaama rutovanta nraase qoravano vitare nritare sinta mwiri takuenta nyari vauru iqisenta Sisasira sia suqe kua timwa mwatenta tinta, Qike, re tira, Kotira nraavu mpaara senama taaramo enaqaa aira mwaretanama qava soqa taiqa saasarave, tianara mwo? <sup>30</sup> So rena saisaqa siane. Rena satariqaantai miavi naane, tinta.

<sup>31</sup> Mwisua mwitaa ti mwauvanta mwisua tunemasenta Kotira aira mwara mwate mwausua mwisua nrora vaintivaravanovaqa, mwaara osara ti mwau vaintisuavaqa, mwisua Sisasirara aaritarama mwate tinta, Mwiva mwo siasua nraasu saisaqa si mwiva siama nrai so saisaqa sianarave. <sup>32</sup> Mwiva Kotiva titai vaintiva Mesaia vaintivanove mwaiso? Mwi vaintiva Isaraari mwatanaa ntaarunya vaintivanove mwaiso? Saqe te mwaitanta takuaararo mwiva nrai satariqaantai miavi nero mwatani tukirere te mwirara qutaa tiare, tinta...

## 16

*Sisasiva qutu vuraqintai qava qaqi ntvivura*

<sup>1</sup> Sarareqaa lutaa mwatanaasua mwaara ena taiqovanta Mariaava Makataaranyaa nraasevanovaqa, mwira kokova Iemisira nrovavaqa, Saromevavaqa, mwi nraasesua ori aquse suqemase mwunta vu irainarara mwaqinta Sisasira mwavanaqaa qumwatarenta vura.

<sup>2</sup> Saante toqaqi suariano mwirini nruvanta mwinravusua Sisasira qunama toraqi virenta vura.

<sup>3</sup> Aarani vitanta mwinravusua nrai mwata rie nrai mwata rie tinta, Tenravu mwini uro naararo ntavave ori nrora qentana suvaito orira raaqu timwataandarove? Mwi oriva nrora orima vaiso, tinta.

<sup>4</sup> Mwitaa timwase mwinravusua nrinenta takuovaro ori qaqinani raaqu qaqini sova vaura.

<sup>5</sup> Orivano mwitaama vauvanta takuenta mwinravusua oriqi mwerane takuovaro vainti mwo qaraasa vaintivano tasuqu tuavaaqara ututo vaintiva mwiraqi sini saantaaqi mwataqaa mwaura. Mwiva mwiraqi mwauvanta mwira takuenta mwinravusua aato suvaro <sup>6</sup> mwiva tiro, Sia aatu siate. Sisasira Nasaretinyaara satariqaa rutaa vaintira nénravu mwira mpuaasi mwariavo? Mwiva sia mwaaqi mwaiso. Mwiva qaqima ntiviso. Nénravu takuaate. Mwaini mwira mwataanani siama mwaiso.

<sup>7</sup> So mwaa kuara mwaqinta uro mwira nraaqiaravaravaqa, Pitaaravaqa, timwa nyiate. Mwitaama timwa nyiate. Mwiva naane ini ntuni Kariri mwataniima viso. Nénravuvaqa mwini uro vinta mwira takuevarave. Ntaaru mwiva mwaitaro mwirara ininravu timwa nyura mate mwivama qovarama viso.

<sup>8</sup> Mwiva mwitaa tuvanta aatu sitantara tinta mwinravusua Sisasira qunama toraqintai mwevane sanenta aarani vitanta sia mwosuavaqa timwa nyiraitinta vura.

## RUKI

### 7

*Taqe nraase mwira mwaaquara tura*

<sup>11</sup> ...Sisasiva mwo mwatusa mwira utu Neni mwatusani vuvanta mwira vaintivaravanovaqa vaaqara nraase qoravanovaqa Sisasira vataqinta vuvaro <sup>12</sup> Sisasiva mwi mwatusara qentaqaa uro takuovanta mwi mwatusaraqintai nraase qoravano qutu vu vaintira mwarenta mwira qunarenta timwa tenta nrurama.

Qutu vu vaintiva taqe nraase mwira mwaaquvano mwauvanta vaaqara nraase qoravano mwi nraaseravaqa mwasenta nruvaro <sup>13</sup> Sisasiva mwi nraasera takuovaro mwira mwuntusa nruvaro Sisasiva mwi nraaserara mpo se tiro mwirara tiro, Sia nataane, tiro. <sup>14</sup> Sisasiva mwitaa tiate uro qinkera tumwarovanta vaintinravuvano qinkera mwira mwarosua mwiraqaa mwataate mwauvaro Sisasiva tiro, araasa vaintio, ne riana qaqi nti vuane tuko, tiro. <sup>15</sup> Tuvoro qutu vu vaintiva ntiviro quturraqintai ntiviro kuavaqa tuvaro Sisasiva mwi vaintira nrai nrora mwurama.

<sup>16</sup> Sisasiva mwitaa suvanta vainti nraase qora esaa nroraqamase aatu itovanta Kotira utu tuaare renta tinta, Mpo paropeti vainti nroraqamase tiri vutaqaa qovarama viso. Te Kotira nraaqiara suraro mwiva sia tiri pisaivave, tinta. Mwisua mwitaa tuvaro Sisasiva aira mwaro mwasaasava esaa lutaa mwaatanivaqa lutaa mwata mwataqa vau mwatusaniaravaqa viro mwi kuava vitaro nritaro suvanta esaa mwi kuara riorama.

### 12

*Kotira aatu aasu aatu sinta mwariate turama*

<sup>4</sup> Ni namwunaao, ini mwavana aasu rusesua sia mwisua aatu aatu siate. Mwisua ini rusenta ini mwanaravaqa sia so rusevarave. <sup>5</sup> Né ntaa aatue sivara siavo? Saqe ne ini timwa nyiase. Né Kotira aatu aatu siate. Mwiva kempusqa siva mwaitaro mwiva vainti mwo ruse mwiraqaantai so mwi vaintira qutu visua vuanani untu pisaisaro mwaiso. Eo, ne iniara tina, Né Kotira aatu aatu sinta mwariate tuko, tiro. Sisasiva mwi kuara turama.

*Vaaqara irainara mwatato vaintirara turama*

<sup>15</sup> ...Sisasiva esaa vainti nraase qora timwa nyiro tiro, Né surauri mwariate. Né vaaqara irainarave vaaqara monove mwarenta mwirara nroraqamase nau riaqi vivo. Né vaaqara irainara mwatate so mwaiqi vuaraarave tivo. Vaaqara irainaravano sia ini saisaqa siranta né suqemase mwaiqi vivarave, tiro.

<sup>16</sup> Sisasiva mwitaa timwate mwiva mwo kuaqaa nuase timwa nyiro tiro, Vainti mwovano vaaqara irainara mwatova sarasaapa mwo utuse mwiraqaantai vaaqara sarasaapa mwase <sup>17</sup> nrai timwase rie tiro, Ne ntaa nraavuraqive mwaa sarasaapara mwataasarave? Esaa ni nraavuqi sarasaapavano suaiqa siso, tiro tuvo.

<sup>18</sup> Mwitaa timwate mwiva qava tiro, Saqe ne esaa nraavu nuquraasena qava nrora nraavu vaaqara nraavu soqasena mwiraqi sarasaapavaqa mwitaa si irainararavaqa mwataase. <sup>19</sup> Ne mwi airara taiqa sena mwitaa tiase, Ne suqema mwauko. Vaaqara sarasaapavaqa vaaqara irainaravaqa vaisana ne vaaqara isi qaqi mwaiqi vina mwaa sarasaaparavaqa nramaivaqa nramwaqi vina suqemase mwariasarave tiase, tiro.

<sup>20</sup> Mwi vaintiva mwitaa tuvaro Kotiva mwira timwa mwiro tiro, Sia ri vu aato vaisarave. Mate enaqi re qutu vinarave. Re qutu viraro rena tutaase tiana irainarara mwovano mwi irainarara mwaraanarove turave, tiro.

<sup>21</sup> Sisasiva nraase qora mwitaa timwa nyiro mwi kuara taiqase mwiva mwisuara tiro, Vaintivano soqaara aasu nau riaqi viro esaa soqaa vaaqara mwataiva mwairaro Kotiva mwi vaintirara tiro, Ri soqaa qumina irainarave. Ne takuaukara re mwaaqu vainti mwariaro. Re qaqi qutu vinarave tianarove, tiro. Sisasiva mwi kuara mwitaa turama.

### 15

*Raumpirima vu vaintirara*

Sisasiva mwaa kuara timwa te tiro:

<sup>11</sup> Nraaru vainti mwovano qora nraaqiara taarama mwatatova mwauvaro <sup>12</sup> naantiaraava mwaitaro nrai qorara tiro, Naantiara re ni miase tina irainarara mate vaa miane, tiro. Mwitaa tuvaro mwira qova nrai mwato irainarara nuqaqamase nrai nraaqiaratana mwora mwiro mwora mwiro suvaro <sup>13</sup> mwira mwaaqu naantiaraava pataqaa mwaitaro mwira qova nrai mwi irainarara mwosua nyiro ori mwarero untu niarani mwo mwatani mwariase tiro vura.

Mwiva niarani mwo mwatani viro mwini mwaitaro mwiva sia suqe vaintinravuvaqa mwariqiro viro <sup>14</sup> nrai ori uro taiqa sero. Mwira orivano taiqa vuvoro mwauvaro mwi mwatarani sia saravaqa vaunani nrora qaaranovalo <sup>15</sup> mwiva mwaaqu vainti mwaitaro mwi mwatanaasua mwo vaintiqaqaa aira

mwarorama. Mwiva mwo vaintiqaa aira mware mwauvaro mwirara uro quara sara nyiane tuvaro<sup>16</sup> mwiva quara sara nyiro tiro, Mpo, nevaqa quara sara viti nyura nraataarave tuvaro mwira sara mwiri vaintiva sia mwauvaro<sup>17</sup> nraataa suvaro mwi vaintiva mwariro aato tusero nau riase tiro, Ni nkora saiqā vaintivaravano vaaqara sarasaapa nre mwariavana ne mwaanto mwaitana sara nraataa sisana mwauko. <sup>18</sup> Saqe ne nena nkova sinani nanena vuase. Ne uro nanena mwirara mwitaa tiase. Ni nko, ne Kotira vuqaavaqa ri vuqaavaqa qaqiraqa si airara mwarauko. <sup>19</sup> Ne mwitaa sinarara tina, ne sia so ri nraaqiara sugeva mwariasarave, Ne ri saiqā vainti aasu mwariasarave. Ne uro nanena ni nkora mwitaa tia mwiasi, tuvo. <sup>20</sup> Mwi vaintiva mwitaa tiasero mwiva ntiviro nrai qova sunani nrurama.

Mwiva mwini aarani viro mwira qora nraavu mwataqa nruvaro mwira qova mwira mwutu takue mwira mwirara riariamase sanero uro mwira mwaaqu navaatavuse mwira suvuqamase mwauvaro mwira mwaaquvano tiro, <sup>21</sup> Ni nko, ne Kotira vuqaavaqa ri vuqaavaqa qaqiraqa si airara mwarauko. Ne mwitaa sukavara tina, ne sia so ri nraaqiara sugeva mwariasarave, tuvo.

<sup>22</sup> Mwitaa tuvaro mwira qova nrai aira mwaro vaitirara timwa nyiro tiro, Né uro tuvaaqa suqera aasu mwaqinta mwiri mwira mwiate. Saantavavaqa iraravaqa mwasenta sumwataate. <sup>23</sup> Purumakau nraatiavaqa rusenta suntaate. Mate mwaasua mwirara riariama saare. <sup>24</sup> Ni maaquvano qutu viso tukaro qaqi nrinaiso. Ni nraaqiaravano raumpirima viso tukaro qaqi qovarama viso, tuvo. Mwira qova mwitaama timwase riariamase sarasaapa mwase mwisua mwira vaasua utunurama.

<sup>25</sup> Mwisua mwira vaasua uti mwauvaro mwira vasaava saiqaqintai nrinero riovanta<sup>26</sup> isi ti mwauvaro riero mwira nrai qora aira vainti mwo mwira riovaro mwiva mwitaa tiro, <sup>27</sup> Ri qatavano mwevantai nrinaisaro ri qova mwirara riariamase purumakau nraati rusero sunta mwataiso. Mwiva ri qata suqemase vitase mwitaa riariamase mwaiso, tuvo.

<sup>28</sup> Mwitaa tuvaro mwira vasaava mwauvaro rara itovaro iqiru tusero sia nraavuqi virero mwaatani mwauvaro mwira qova mweva nero mwira sapara suvaro mwira mwaaquvano mwitaa tiro, <sup>29</sup> Ne vaaqara isi ri aira mwarenta mwaitana sia ne mwo enavaqa ri kua anuauko. Ne nena tontivaravaqa riariama saare tukara re sia memeraa nraati mwonku nuqutu sera ni miaro. <sup>30</sup> Mwaava ri mwaaquvano nraaserara nuararo mwaitaro mwiva re mwiana irainarara mwarero untu taiqase untu nane nrisarara re mwirara purumakau nraati suqera qumina mwirara nuqutu sera mwiaro, tuvo.

<sup>31</sup> Mwitaa tuvaro mwira qova qao tiro, Ni maaqu, re nivaqa mwariaravave. Ne mwi irainarara tentatana mwataunarave. <sup>32</sup> Ri qatavano qutu viso tukaroma qaqi nrinaiso. Mwiva raumpirima viso tukaroma qaqi qovarama viso. Mate te mwirara riariamase mwariare, turama. Sisasiva mwi kuara turama.

## 16

### *Sisasiva Rasarusirara tu kuara*

<sup>19</sup> Sisasiva mwitaa timwa sero mwiva mwo kua nraase qora ntu nusua timwa nyiro tiro, Vainti mwovano vaaqara irainara mwatatova suqe tuvaaqa nukutova mwo nrau mwo nrau suqe su sarara aasu nretaro mwauvo.

<sup>20</sup> Mwi vaintiva mwi sarara aasu nretaro mwauvaro vainti mwovano mwira utu Rasarusiva mwavanta mwosua mwi vaintira vitenta uro vaaqara irainara mwato vaintira qentaqaa i sovaro mwiva mwinto mwauvo. Mwi vaintiva sia irainaravaqa mwato vaintiva mwaaqu vaintivano mwauvaro nrumwaaravano esaa mwira mwavanamaata vauvaro<sup>21</sup> mwi vaintiva mwaitaro vaaqara irainara mwato vaintiva sara nretaro viti piso sarara mwi sarara aasu nrarero mwauvo. Sia irainara mwato vaintiva mwinto mwitaa mwavanta vairi mwonravuvano vitare nritare sitanta mwira nrumwaara mposu nroram.

<sup>22</sup> Sia vaaqara irainara mwato vaintiva qutu vuvanta naavunyaasua mwira vita mwarenta uro Avarahaamua nrai saivaqava mwaunani i senta. Mwira uro i sovaro mwinto mwauvaro<sup>23</sup> vaaqara irainara mwato vaintiva mwivavaqa qutu vuvanta mwira mwataqi qunama tovaro mwiva qutu vusua mwaaqani mwaitaro qara nuase mwauvo. Mwitaa mwaitaro mwutuni takuovaro Rasarusiva mwinto Avarahaamuravaqa mwaitaro suqema mwauvo.

<sup>24</sup> Mwinto mwitaa mwauvaro mwiva Avarahaamurara saparamase tiro, Avarahaamuo, tiri qo, niara mpo timwa mataane. Re Rasarusira vusi tiraro mwiva uro nrai saqu nramaiqi naasero untu ni maaqiriqaa mwatairaro ni maaqirivano sumpama vuarive. Ne nrora tia itairaqi mwarinama qara nina mwauko, tuvo.

<sup>25</sup> Mwitaa tuvaro Avarahaamua qao tiro, Ni mpaio, re riaane. Re nraaru qaqi mwau enara suqe irainara mwate mwaauraro Rasarusiva sia suqe irainara aasu mwatovave. Mate mwiva mwaanto mwaitaro suqema mwaisara re mwinto mwaitara qara nira mwariaro. <sup>26</sup> Re qava rie mwaiqe mwo kua ri timwa mwiasi. Re mwariarante te mwaauraro qina nraravano vutana vaiso. Mwaitai vuaso mwintai nrasio tiro Kotiva qina nrora mwataiso, tuvo.

<sup>27</sup> Avarahaamua mwitaa tuvaro mwi vaintiva tiro, Mpo tiri qo, re Rasarusira vusi tiraro mwiva ni nkora nraavuqi uro mwaitaro<sup>28</sup> ni nkata mpasaa nkuaanania saquru timwa nyiarive. Mwisuavaqa mwaini ita virani nrivo, tuvo.

<sup>29</sup> Mwitaa tuvaro Avarahaamua qao tiro, Mosesivavaqa paropeti vaintivaravaqa qumwaarara to kuava vaiso. Mwisua mwi kuara so rievavave siavo, tuvo.

<sup>30</sup> Mwitaa tuvaro qaqi mwau enara vaaqara irainara mwato vaintiva tiro, Siave, tiri qo, Avarahaamuo, qutu vuari vaintiva uro nane timwa nysisanta mwisua mwira kua rietanta qaqiraqa si airara pisevarave siavo, tuvo.

<sup>31</sup> Mwitaa tuvaro Avarahaamuva qao tiro, Mwisua Mosesira kuavaqa paropeti vaintivara kuavaqa sia rientente, qutu vuari vaintiva uro nane tiari kuaravaqa mwisua sia so rieverave siavo turave turama. Sisasiva mwi kuara turama.

## 22

### *Sisasira navaatavu sora*

<sup>47</sup> Sisasiva mwini mwaitaro kua qaqi ti mwauvanta vaaqara vaintivano nrinora. Sisasira nraaqiara 12 nravuqintai Sutaasiva vaaqara vainti ntita mware mwiva naane mwisua ntuni nriri Sisasiva mwaunani nrinero uro Sisasira mota nare uti mwauvaro <sup>48</sup> Sisasiva tiro, Sutaasio, re ni mota sera ni mwataqi mwataai nraaqiarara nramwutaa ntuqaave ni qovarama senarave? tiro.

<sup>49</sup> Sisasiva mwitaa tuvanta mwira nraaqiaravara mwira vaqamase mwausua takuovanta mwisua Sisasira navaatavu sarenta uti mwauvanta mwinravusua Sisasirara tinta, Nrora vaintio, tenravu paipaqontai mwisua tuqu saanarave? tinta. <sup>50</sup> Sisasira nraaqiaravaravano mwitaa tuvaro mwinravusuaqintai mwovano Kotira aira mwara mwate mwau vaintisua mwisua vunyaa vainti aira vainti mwo tuquse mwira aato tuqu sovaro untu nuvaro Sisasiva sove tiro <sup>51</sup> timwase mwi vaintira aatoqaa nrai saqu mwatataro mwira aatovano tavana vura.

<sup>52</sup> Kotira aira mwara mwate mwau vaintisua mwisua nroranravuvanovaqa, Kotira nraavuqa naqisi mwau kiripuvanovaqa, nrora vainti mwonravuvanovaqa, mwisua Sisasira navaatavu sare nrusuara Sisasiva tiro, Né kamaanira vaqamase naquari vaintira votaamase navaatavu sarentave né paipavaqa saavuvaqa mware nrriavo? <sup>53</sup> Ne ini vaqamasena mwo nrau mwo nrau Kotira nraavuqi mwaigina vi mwaukanta né sia ni navaatavu saarave. So mate mwaa enava ini enama vaiso. Mate rupisiqu mwariari irainava kempusaqama sianarove, tiro.

## 23

### *Sini toسانی ruto vaintiva kua tura*

<sup>39</sup> Kamaanira kua anuo vaintiva mwovano sini toسانی rutova mwivavaqa Sisasira sia suqe kua timwa mwi tiro, Qutaave re Mesaia vaintivano mwariaro? Re renavaqa tiritanavaqa saisaqa siane, tiro.

<sup>40</sup> Mwitaa tuvaro kamaanira kua anuo vaintiva mwovano qao tiro, Re siave Kotira aatu siaro? Mwisua tiritana votaamase mwiravaqa rutaavo. <sup>41</sup> Mwisua tiritana so rutaavo. Mwisua tiritana sia suqe aira saara tiritana rutaavo. Mwi vaintiva sia qaqiraqa si airara mwaraivave, tiro. <sup>42</sup> Mwitaa tiase mwiva Sisasirara tiro, Sisasio, ri nroraqama saari enaraqaa re niaravaqa riaane, tiro.

<sup>43</sup> Mwitaa tuvaro Sisasiva tiro, Ne ri timwa mwiarira riaane. Mate re nivaqamase suqe mwatusani mwarinarave, tiro.

### *Sisasiva qutu vura*

<sup>44</sup> Mwitaa tuvaro suarivano mamatama nruvaro mwiraqaantai rupisima vuvaro sia suarivano itovaro rupisi aasu rutovaro suari tukiviro 3 kirokuqaa suvaro qava ataama vura. <sup>45</sup> Ierusalemi mwatusani Kotira nraavuqi tausa votaama vauraqi nrora vaaqa siritova vutaqaa nrai nuqe vuvaro <sup>46</sup> Sisasiva satariqaa mwaitaro nroraqamase oi aai tiase, tiro, Ni nko, ni mwarana mwaraane, tiro. Mwitaa tiase Sisasiva qutu viro.

<sup>47</sup> Sisasiva qutu vuvaro naqu vaintisua qiata vaintivano Sisasiva mwitaa sura takuero Kotira utu tuaarere tiro, Qutaama mwaa vaintiva suqema nrue mwai vaintivave, tiro.

<sup>48</sup> Mwitaa tuvanta mwo susua mwi irainarava qovara sura takuarenta suntu nukaama vusua mwisua mwaitanta takuama senta mwiraqaantai mwisua nyari mwaaqani nyari mwaaqani nanenta vitanta mwuntusa sia suqe suvanta nyari mwuntusa nuqutuse vura. <sup>49</sup> Mwisua vuvanta Sisasira vataqi nrue mwau nraase qorasuvaqa, nraase mwonravu Kariri mwatantai Sisasira vataqi nrue mwausuvaqa, mwisua niarani mwaitanta mwi irainarava qovara sura takuora.

## 24

### *Emeasi mwatusaniara vu vaintitanasura tura*

<sup>13</sup> Mwi enaraqaa Sisasira nraaqiara taaranavano mwo mwatusa Emeasi mwatusani virenta vura. (Taputantai voqaama Veqaurani voqaama mwira votaama Ierusalemi vauvaro Emeasi mwatusa vaura.)

<sup>14</sup> Mwitana aarani vitanta Sisasira ruso kuara timwaqi vinta. <sup>15</sup> Mwitana timwaqi vuvaro Sisasiva nrai nrinero mwitana vaqamase uro vuvanta <sup>16</sup> mwitana Sisasira takuenta sia mwira qintutama takuaraitinta, mwo vaintinovave tuvaro <sup>17</sup> Sisasiva mwitanara tiro, Netana aarani nritantama nara kuave nrai timwa mwi nrai timwa mwi vi mwariavo? tiro.

Mwitaa tuvanta mwitana uro mwiraqaa ntivinta mwitana mwuntusavano sia suqe suvanta mwaura. <sup>18</sup> Mwovano Kiropaasiva Sisasira mwata rie tiro, Mwaa enara vaaqara vaintinravuvano mwiri Ierusalemi mwariavara re nkuinkuvanove nanau qovarama vi kuara siave riaaro? tiro. <sup>19</sup> Mwitaa tuvaro Sisasiva, Nara kuave? tuvanta mwitana tinta, Sisasira Nasaretinyara kuave. Mwi vaintiva

paropeti vaintivano mwaitaro Kotira vuqaavaqa nraase qora ntuqaavaqa nrora aira mwaretanta suqe kua aasu tirave. <sup>20</sup> Mwiva mwitaa si mwarisanta Kotira aira mwara mwate mwaria vaintisua mwisua nrora vaintivaravanoqa, tiriqaa naqisi mwarisuaavaqa, mwisua kamaanira mwira mwivavaro mwiva mwira rusaate tisanta mwira niriqontai satariqaa rutaarave. <sup>21</sup> Te ntaaru mwi vaintirara Kotira mwira titaisaro mwiva mwo mwatanaasua aatarase tiri Isaraari mwatanaasuaqaqaa naqisiarivave nraarave. Kua mwovaqama vaiso. Mwira rusaavaro mate taaramo ena nritaraiso. <sup>22</sup> Mate tetana nraasenravuvano tia kuara rienta isarama vuro. Mwinravusua ota toqaqi mwira qunama taaraqi uro nenta sia mwira mwavana takuaavo. <sup>23</sup> Mwi nravusua uro nanenta mwiri tiri timwa timwi mwitaa tinta, Naavunyaasua tirinravuara mwiva qaqima mwaiso, tiavo, tiarave. <sup>24</sup> Nraasenravuvano mwitaa tiavanta tirinravuqintai mwo vaintinravuvano mwira qunama taaraqi uro vi uro takuaavaro nraasenravuvano tia kuava mwivauma vaisanta mwinravusuaavaqa mwira mwavana sia takuaarave, tinta.

<sup>25</sup> Mwitana mwitaa tuvaro Sisasiva mwitana timwa nyi tiro, Siave initana vu aato vaiso? Ntaaru paropeti vaintivaravano timwato kuara nétana mwi kuara qutaave tiataara vaisanta nétana qasomase mwi kuara rie mwariavo. <sup>26</sup> Nétana siave riaavaro Kotiva titaari vaintiva mesaia vaintivano itavi irainarara mwaraqi viro mwiraqaantai nroraqamavi kempusa vaintivano mwarianarove, tiro. <sup>27</sup> Mwitaa timwase Sisasiva Mesaia vaintiara Kotira vukuqi qara qumwaara rato kuara mwitana timwa nyirero tosarero Mosesira vukuqintai timwa nyiqiro viro paropetivara vukuqintai timwa nyiqiro vura. <sup>28</sup> Mwitaa ti mwauvaru mwitana virenta su mwatusava mwataqaa vauvaro Sisasiva aarana qaqi virero votaama uti mwauvanta mwitana qao tinta, <sup>29</sup> Mate ena sianarove. Pisera tiritanavaqa vaitaane, tuvaro Sisasiva mwitanavaqa mwairero nraavuqi vura.

<sup>30</sup> Sisasiva nraavu mwiraqi mwaitaro sara taintaqaa mwitana vaqamase mwataqaa mwai Kotirara suqeve timwase mpereti sara uveqase ntusamase nyuvanta mwitana vu aato qintutama vuvanta qintutama rienta <sup>31</sup> mwitana mwira qintutamase takuovaro Sisasiva mwitana ntuqaantai qumpau vura. <sup>32</sup> Sisasiva qumpau vuvanta mwitana nrai timwa mwi nrai timwa mwi tinta, Mpo, mwiva aarana nritaro Kotira vukuqintai kua tiritana timwa timwi mwaiso qutaama tiritana mwuntusaqintai suqe siso, tinta.

<sup>33</sup> Mwitaa timwase mwitana vaavaama ntivinta mwiri nane Ierusalemi uro Sisasira nraaqiara 11 nraavu mpuaamase takuovanta mwinravusua mwo vaintinravuvuqa suntu nukaama mwainta tinta, <sup>34</sup> Nroravano qutaama qava qaqi ntiviso. Saimoniva mwivama mwira takuaiivo tuvanta <sup>35</sup> mwitanavaqa aarani nruenta takuorara mwisua timwa nyi tinta, Mwiva mpereti sara uveqa saisanta mwiraqaantai tetana nrora vainti qintutama takuaunarave, tinta.

*Sisasiva nrai nraaqiara ntuqaa qovarama vura*

<sup>36</sup> Mwitana kua mwisua timwa nyi mwauvaru vaavaama nroravano mwivama qovarama viro mwisua aaqani ntivi tiro, Ini mwuntusavano qisaqaama vasiarive, tiro. <sup>37</sup> Mwitaa tuvanta mwisua nroraqamase aatu si tinta, Vaanavano qovarama viso, tuvaro Sisasiva mwisuara tiro, <sup>38</sup> Né narare aatu si mwariavo? Né nararave niara taara aato nauri rie mwariavo? <sup>39</sup> Né ni iqu saqu takuaate. Ne mwivama suko. Sia vaanavano ni votaamase mwatitavaga mwusaarivaqa vaiso, tiro.

<sup>40</sup> Mwitaa timwase mwira nrai iquvaqa saquvaqa tia nyuvanta <sup>41</sup> mwisua mwoqamase riaria tinta saqu nunkinkiraarate tinta, Sia mwirara qutaave tiare, tuvaro Sisasiva mwisua mwata rie tiro, Sara nraariva vairove? tuvanta <sup>42</sup> tavusa suntatora pataqa mwira mwuvaro <sup>43</sup> Sisasiva mwisua ntuqaa mwaitaro mwarase nrora.

<sup>44</sup> Sisasiva tavusa nramwase mwisua timwa nyi tiro, Ntaaru ne inivaqa mwaitana ne mwaa kuara ini timwa nyurave. Niara ntaaru Mosesiva vukuqi qumwaara rato kuarave, paropeti vaintivaravano qumwaara rato kuarave, Saami vukuqi qumwaara rato kuarave, ne ini timwa nyitana mwi kuava mwivauma vasianarove, turave, tiro.

<sup>45</sup> Mwitaa timwase mwisua Kotira vukuqi qumwaara rato kuara qintutamase riaate tiro Sisasiva mwi kuara mwi kuara mwisua timwa nyi tiro, <sup>46</sup> Mwaa kuara qumwaara ratorave, Mesaia vaintiara mwiva ita vuari irainara mwaqi uro qutu viro taaramo ena mwari qava qaqi ntivuanarove. <sup>47</sup> Mwiraqaantai né ni airara ni utuara rietantama nraase qora timwa nyiqi vitanta sia suqe si aarara pisaivaro Kotiva né sia suqe airara mware kuara nrunka nyataanarove, tiate. Mwi kuara timwa nyiqi vitanta Ierusalemi naane mwi kuara timwa nyiqi vinta mwiraqaantai mwo mwatanaasua mwo mwatanaasua timwa nyiqi vuare. <sup>48</sup> Nénravu nénta ntuqaantai mwi airara mwi irainarara takuaarave. <sup>49</sup> Ni nkova nrai saqu iqiqaq mwatero nena ini nyirerave tiarinara nevano mwira titaariro tukuarive, Né mwaa mwatusaraqi mwaqi vivaro naavuntai mwiva tukiuro iniqaa mwaitaroma ini kempusa nyianarove, tiro.

*Sisasiva naavuni vita mwarora*

<sup>50</sup> Sisasiva mwitaa timwase mwiva mwisua ntita mware Ierusalemi mwatusa mwini se Vetaani mwatusani uro ne nrai saqutana tuaarerase mwisua suqema nyate. <sup>51</sup> Sisasiva mwisua suqema nyate mwaitaro mwiva mwisua mwini sovaro mwira naavuni vita mwarora.

<sup>52</sup> Sisasiva naavuni vuvanta mwira nraaqiaravara mwini so vaintivarasua suqe suvanta mwiri nane Ierusalemi vinta uro mwini mwaitanta Kotira nraavuqi uro Kotira utu tuaareraqinta vi mwaura.



## IONI

### 3

*Nikotimasiva Sisasira uro takuora*

<sup>1</sup> Parasi vainti mwovano mwauvaro mwira utu Nikotimasira. Nikotimasiva lutaa mwatanaasua ntarunyaa vainti mwaura. <sup>2</sup> Mwiva mwariro enaqi uro Sisasira takuero tiro, Mwaara ti mwariara vaintio, te takuauraro Kotiva ri titaisarara tira, re mwaara kua ti mwariarava nrira siaro. Sia Kotiva ri saisaqa sitirina, re siama nrora aira mwaraaratirinao, tiro.

<sup>3</sup> Mwiva mwitaa tuvaro Sisasiva mwira timwa mwiro tiro, Ne qutaa kua tiarira riaane. Vainti nrora tuaiva mwairaro mwira sia qavavaqa mwataairere, mwi vaintiva siama Kotiva naqisiari mwatusara so takuaanarove, tiro. <sup>4</sup> Tuvaro Nikotimasiva qao tiro, Ntataa sirarove nrora tuai vaintira qava mwataa-anarove? Mwiva qava nrai nrora visosaqi viqetairarove mwira nrova mwira qava mwataa-anarove? tiro.

<sup>5</sup> Tuvaro Sisasiva tiro, Ne qutaa tuko. Nramaiqi mwataariva mwairaro sia Kotira Mwananavano mwira qava mwataairaro mwiva sia Kotiva naqisi mwatusarani vuanarove. <sup>6</sup> Mwavana mwataava nrai mwavana mwataara aasu mwataairave. Mwananavano mwanana aasu mwataairave, tiro. Ini qava mwataairi kuarara ne ri timwa mwukara re mwi kuarara isaramave vuarove? Sia mwitaa siane. Ne mwo kuaqaa nuase ri timwa mwirenave. Saaravano titaro mwini mwini vuataa sisaro viso. <sup>8</sup> Saaravano tuqi visara re sia mwira takuaraitira, re mwira quka aasu rianarave. Re saaravano nriri osararave mwiva vuari osararave sia qintutama riaaro. So Kotira Mwananavano mwataai osarava mwira votaama vaiso, tiro.

<sup>9</sup> Sisasiva mwitaa tuvaro Nikotimasiva tiro, Ntataama serove mwitaa sianarove? tuvaro <sup>10</sup> Sisasiva tiro, Re Isaraari mwatanaasua mwaara kua timwa nyi mwariarave mwaitarove mwi kuara sia qintutama riaaro? <sup>11</sup> Ne qutaa tuko. Te qintutama riaina kuara ini timwa nyi mwauko. Mwitaa suravanta né sia tiri kua qintutama riavao. <sup>12</sup> Ne mwatanyaa irainara ini timwa nyukanta né mwirara sia qutaa kuave tiavo. Né mwitaa tiavana ne naavunyaa irainara ini timwa nyiarinta, né ntataamase mwi kuara so qintutama rievareve? <sup>13</sup> Sia vainti mwovano naavuni Kotiva mwainani virave. Ne aasuma mwintai tukuko. Ni mwataqaa mwataiva ne nraaru naavuni mwarivarave.

<sup>14</sup> Nraaru ini saivaqaa Mosesiva qumina mwatani mwaitaro kuanira mwanana oriqaantai utuse mwira satari ratoraqaa tuaare rasorave. (Nraase qoravano mwira takue sia qutu vuete tiro, Mosesiva mwitaa surave.) So ne mwataqaa mwataai nraaqiarava ne mwariarinta nraaru Mosesiva kuanira mwanana utuse mwatonemase nivaqa satariqaa tuaare rasaivanta <sup>15</sup> nraase qoravano niara qutaa mwivave tisua sia qutu vinta taiqa viraitinta, mwisua esaa ena esaa ena qaqi mwariqi vivarave, tiro. Sisasiva mwitaa turama.

<sup>16</sup> Kotiva mwataqi mwarisua mwoqamase mwuntusa nisarora tiro, mwiva nrai mwaaqu nkuaiqa mwataaira tiri tivira. Mwitaa sirara tinta, nraase qoravano mwira mwaaquara qutaave tisua sia qutu vinta taiqa viraitinta, mwisua esaa ena esaa ena qaqi mwariqi vivara.

<sup>17</sup> Kotiva nrai mwaaqu titovaro mwiva sia nraase qoraqaa kua mwatarero tukiso. Nraase qoravano suqema mwariate tiro, mwiva tukura.

<sup>18</sup> Mwovano mwira mwaaquara qutaa mwivave ti mwarirava mwivama sia kua mwananaro. Mwovano mwirara sia mwivave ti mwarirava mwivama nrora kua mwananaro. Mate mwaa enara Kotiva ko timwase mwi vaintira qoririma saira. Mwi vaintiva Kotira mwaaqu nkuaiqa mwataairara sia qutaa mwivave tira saara Kotiva mwira qoririma saira.

<sup>19</sup> Mwaa irainarara saara kua vasianaro. Tomwavano mwataqi tukuvanta nraase qoravano sia mwira riarira siraitinta, mwisua rupisi sirara riarira tinta mwarira.

<sup>20</sup> Sia suqe sia vaintisua mwovano mwovano nramwutaaqa sitanta sia mwi tomwara riarira siraitinta, mwisua sia tomwavano mwainani vuara. Tomwavano tiri sia suqe aira ataa timwataaso tinta sia tomwavano mwainani vuara. <sup>21</sup> Mwisua mwitaa siavaro qutaa aira mware vari vaintiva sia aatu siraitiro, tomwavano mwainani vira. Mwiva visaro tomwavano mwira aira ataa mwataisanta nraase qoravano takuavaro mwi vaintiva Kotira kua rietaro Kotira aira mware mwaira.

## 9

*Sisasiva vu qimpo vaintira vu mpaia sora*

<sup>1</sup> Sisasiva vitaro takuovaro vainti mwovano nrai nrora visosaqintai vu qimpa vuvu mwauvanta <sup>2</sup> Sisasiva vaintivaravano Sisasiva mwata rienta tinta, Mwaara kua tiara vaintio, ntavave qaqiraqa si irainarara mwasaisarove mwaa vaintira vu nrai nrora visosaqintai vu qimpa viva mwaiso? Nraive siso mwira nrosua qosuave qaqiraqa si irainarara utu saavarove mwira vuvano qimpa viso, tinta tuvo.

<sup>3</sup> Sisasiva vaintivaravano mwitaa tuvaro Sisasiva qao tiro, Sia nrai qaqiraqa si irainarara mwaraira saara mwira vu qimpa viso. Siama mwira nrosua qosua qaqiraqa si irainarara utu saavaro mwira vu qimpa viso. Né mwi vaintiraqi Kotira kempusaqama aira takuaate tiro, mwira vuvano qimpa viso. Kotiva ni nti mataisana ne tukukavave. <sup>4</sup> Te Kotira aira ataa siarinto mwananaro. Ena siraro sia mwo

vaintivano aira so mwaraanarove. <sup>5</sup> Ne mwataqe mwaitana tomwavano itainema sena ne itamaqina vuairo mwataqi mwaisua so takuevarave, tiro tuvo.

<sup>6</sup> Sisasiva mwitaa timwa sero mwataqaa taara visise taaraqontai soraqamase mwiti vainti vuqaa naatauruse mwirara tiro, <sup>7</sup> Re Siromi nramaiqi untu rena vuri siqama saane, tiro. Sisasiva mwitaa tuvaro mwi vaintiva Sisasiva tunema untu nrai vuri siqama sovaro mwira vuvano mpaيرا vuvano mwi vaintiva mwintai untu nane so takuamaqi nrurama.

<sup>8</sup> Mwiva so takuamaqi nri mwauvanta mwira nraavu mwataqa mwausua takuovaro aara tosani mwaitaro pata irainara nivaqa miate ti mwau vaintiva qaqi nruvanta mwisua mwira takuenta tinta, Nta vaintivave nriso? Aara tosani mwaitaro pata irainara nivaqa miate ti mwau vaintivave nriso? tinta. <sup>9</sup> Mwisua mwitaa tuvanta mwonravuvano tinta, So mwi vaintiva mwivave, tuvanta mwonravuvano qao tinta, Mwovanove. Mwira vuri votaa siva nriso, tuvaro mwi vaintiva nrine tiro, Ne mwaa mwivama suko, tiro tuvo.

<sup>10</sup> Mwi vaintiva mwitaa tuvanta mwisua mwira mwata rienta tinta, Ntataama saisarove ri vuvano mpaira viso? tinta. <sup>11</sup> Mwisua mwitaa tuvaro mwiva timwa nyiro tiro, Vainti mwovano mwira mwutu Sisasiva mwitaa taara visise soraqamase ni mpuqaa naatauruse niara tiro, Siromi nramaiqi untu rena vuri siqama saane, tisana ne untu siqama saukaro ni mpuvano mpaira visana ne so takuamaqina nruko, tiro. <sup>12</sup> Mwiva mwitaa tuvanta mwisua mwira qava rienta tinta, Mwi vaintiva ntaini visare nrario? tinta. Mwisua mwitaa tuvaro mwiva tiro, Nrai ntainive vivaaso? Ne siavaqa takuauko, tiro.

<sup>13</sup> Mwiva mwitaa tuvanta mwisua nraaru vu qimpo vaintira vita mwarenta uro Parasi vaintivaravano mwaunani vurama. <sup>14</sup> Sisasiva mwaara kua tu enaraqaa soraqamase mwi vaintira vu mpaira sorama. <sup>15</sup> Mwisua Parasi vaintivaravano sunani vitaqi uro sovanta Parasi vaintivaravano mwi vaintira mwata rienta tinta, Ntataama saisarove ri vuvano mpaira viso? tuvaro mwi vaintiva tiro, Mwiva soraqamase ni mpuqaa naatauru mataisana ne untu nena mpuri siqama saukaro ni mpuvano mpaira visana ne so takuauko, tiro.

<sup>16</sup> Mwiva mwitaa tuvanta Parasi vainti mwonravuvano tinta, Mwi airara mwaraiva mwaara enaqaa mwitaa siso. Mwiva mwaara enaqaa sia mwitaa siataara vasisaro mwiva kua qanuase mwitaa siso. Mwitaa sisorara tiro, mwi vaintiva sia Kotiva sinani tukivave, tinta. Tuvanta Parasi vainti mwonravuvano qao tinta, Ntataama serove qaqira vaintivano mwi airara nrora mwarai airara so mwaraanarove siso? tinta. Mwitaa timwa senta mwonravuvano mwo kua tuvanta mwonravuvano mwo kua tinta.

<sup>17</sup> Parasi vaintivaravano qava mwira mwata rienta tinta, Mwiva ni mpu mpaira sairave tianarave. Mwi vaintirara re nara kuave tiaro? Mwiva ntataama mwai vaintivave ri vu mpaira saiso? Re tiri timwa tivivaqe riaare, tuvaroma vainti mwiva tiro, Mwiva paropeti vaintivano mwaiso. Kotiva mwira saisaqa sisaro mwiva aira mware mwaiso, tiro.

<sup>18</sup> Mwitaa tuvanta lutaa vaintivaravano sia mwira kuara qutaa kuave tiarera mwi vaintirara tinta, Re muna titara ni mpu mpaira viso tiaro. Nraaru sia ri vuvano mpaira vurave, tinta. Mwitaa timwa senta mwisua mwira nrosua qosua sapara suvanta <sup>19</sup> mwitanavano nruvanta mwisua mwitana mwata rienta tinta, Mwaa vaintiva initana nyyaauve siso? Qutaave mwira nrora visosaqintai vu qimporave? Ntataama saisarove mwira vuvano mpaira visarove takuaiso? tinta.

<sup>20</sup> Mwisua mwitaa tuvanta mwira nrosua qosua tinta, Mwaa vaintiva tiritana mwaaquve. Mwira vuvano nraaru visosaqintai qimporave. <sup>21</sup> Nrai ntataa sisarove mwira vuvano mpaira viso? Nrai ntavave mwira vu mpaira saiso? Mwiva nrora tuaivave. Né nénta mwira mwata riaate. Mwiva so ini timwa nyianarove, tinta. <sup>22</sup> Mwira nrosua qosua lutaa vainti nrora vaintivara aatu sitanta mwitaa turama. Nraaru lutaa vaintivaravano mwitaa kua mwatate tinta, Vainti mwovano Sisasirara mwiva Mesaia vaintivano tiri saisaqama sirero tukivave tiaso. Mwovano mwitaa tirarore, te mwira irora sinta mwaara nruvuqintai mwira raagu saararo mwiva mweva ne esaara vuarive, turama. <sup>23</sup> Lutaa vainti nrora vaintivaravano mwitaa turara tinta, mwira nrosua qosua lutaa vainti aatu sitanta tinta, Mwira nrora tuaivave. Né nénta mwira mwata riaate, turama.

<sup>24</sup> Mwitanavano mwitaa tuvanta mwisua qavavaqa nraaru vu qimpo vaintirara sapara sinta mwirara tinta, Re Kotira riaria siataarave. Sisasiva sia suqe vaintive, tinta. Mwisua mwitaa tuvaro mwi vaintiva tiro, <sup>25</sup> Sisasiva sia suqe vaintive siso suqe vaintive siso sia ne qintuta suko. Ni mpu qimpora mwiva mpaira sorara ne mwirara aasu qintuta suko, tiro.

<sup>26</sup> Mwiva mwitaa tuvanta mwisua mwira qava mwata rienta tinta, Mwiva ri narave utiso? Mwiva rinta ntataama setarove ri vu mpaira saiso? tuvaro vainti mwiva tiro, <sup>27</sup> Ne vaa mwirara ini timwa nyukanta né siave riaavo? Né ntataa si santave qava mwi kuara riarentave tiavo? Névaqa mwo? Névaqa mwira vaintivaravaqa mwariarentave qava mwi kuara ni mata riaavo? tiro.

<sup>28</sup> Mwiva mwitaa tuvanta mwisua mwira nroraqamase irora sinta timwa mwinta tinta, Qao, revano mwira vaintivano mwaitara mwira kua riaravave. Te tenta saivaqara Mosesira kua riaqi vuasuave. <sup>29</sup> Nraaru Kotiva Mosesira timwa to kuara te mwi kuara riaqi vuasuave. Te Sisasirara qumina vaintive turo. Te mwiva mwintai nri osarara sia qintuta suro, tinta.

<sup>30</sup> Mwisua mwitaa tuvaro mwiva nrai saqu nunkinkiraara tero mpo se tiro, Ni mpu mpaira sai vaintiva mwiva mwintai nri osarara né siavaqa qintuta siavo? <sup>31</sup> Te riaruro Kotiva qaqira vainti kua sia riaivave. Kotira kua riasua Kotiva mwisua kua riaivave. Kotira uo tuaareraa vaintisua kua Kotiva riaivave.

<sup>32</sup> Nraaru mwaa mwatara hoqarato enaraqaatairo sia vainti mwovano nrai nrora visosaqintai vu qipa vura mpaipa sorave. <sup>33</sup> Sisasiva sia Kotiva sinani tukuase titirina, mwiva sia so ni mpu mpairaitirinao, tiro.

<sup>34</sup> Mwi vaintiva mwitaa tuvanta mwisua mwira irora sinta tinta, Ri nrova qaqiraqa si airara mware ri mwatataivave. Re mwo? Re tirivaqave i mwaara kua timwa tivinarave siaro? tinta. Mwitaa timwa senta mwisua vainti mwira raaqu senta mwaatani pisorama.

<sup>35</sup> Mwisua mwira raaqu senta mwaatani pisovaro Sisasiva mwisua mwira raaqu senta pisorara riero mwi vaintirara mpuaama takuero mwirara tiro, Mwataqi mwatatai nraaqiarara re qutaa mwivave tinarave siaro? tiro. <sup>36</sup> Sisasiva mwitaa tuvaro mwi vaintiva mwira mwata riero tiro, Nrora vaintio, mwiva ntavave? Re ni timwa miqena ne mwirara qutaa mwivave tiase, tiro. <sup>37</sup> Mwitaa tuvaro Sisasiva mwira timwa mwiro tiro, Re takue mwariara vaintiva ne mwivama riar ti mwauko, tiro.

<sup>38</sup> Sisasiva mwitaa tuvaro mwiva tiro, Nrora vaintio, qutaa re mwivave, tiro. Mwitaa timwa sero mwiva Sisasira vuqaa tori naquntaase mwira riariamase mwinto mwauvaro <sup>39</sup> Sisasiva tiro, Ne nraase qora ntusama sirena mwataqi tukukavave. Vu qimpaisua takuaate tina, ne mwataqi tukukavave. Qaqi takuesua vu qimpa vuata tina, ne mwataqi tukukavave, tiro.

<sup>40</sup> Sisasiva mwitaa tuvanta Parasi vaintivaravano mwi kuara rienta Sisasira mwata rienta tinta, Tiri tivuve qimpa viso? tinta. <sup>41</sup> Mwitaa tuvaro Sisasiva mwisua timwa nyiro tiro, Ini vu qimpa visantavauma kuavano sia iniqaa vasianarove. Né tinta, Te so takuauro, tiarara tiro, kuavano iniqaa vasianarove, tiro. Sisasiva mwitaa turama.